



21 JUN, 2025

Insentif Cepak Tenaga galak penggunaan elektrik berhemah

Berita Harian, Malaysia



Insentif Cepak Tenaga galak penggunaan elektrik berhemah



Putrajaya: Insentif Cepak Tenaga akan diperkenalkan sebagai galakan kepada 23.6 juta pengguna domestik yang mengamalkan penggunaan elektrik secara berhemah, kata Suruhanjaya Tenaga (ST).

Melalui insentif itu, ia berkata, pengguna domestik dengan penggunaan elektrik 1,000 kWj dan ke bawah dijangka tidak terkesan dengan pelaksanaan jadual tarif baharu.

Selain itu, katanya, pengguna bukan domestik voltan rendah yang menggunakan 200 kWj dan ke bawah turut akan mendapat manfaat daripada insentif itu.

“Selain itu, skim Masa Penggunaan atau ‘Time of Use’ (TOU) telah diselaraskan diperluas kepada tempoh luar puncak yang lebih panjang iaitu keseluruhan Sabtu, Ahad dan jam 10 malam sehingga 2 petang pada Isnin hingga Jumaat.

“Ini bagi menggalakkan pengurusan penggunaan yang lebih cepak mengikut waktu permintaan, sejajar dengan usaha ke arah sistem tenaga yang lebih cepak dan lestari,” katanya dalam satu kenyataan.

ST berkata, sekiranya pengguna

na menggunakan waktu di luar puncak, pengguna dapat menjimatkan bil elektrik berbanding penggunaan ketika waktu puncak.

Ia menjelaskan, bagi memastikan aspek sosial dan kebajikan dipelihara, kerajaan bersetuju supaya tarif spesifik digunakan bagi kategori pertanian, perkhidmatan air dan pembetulan serta operator rel atau *traction*.

Katanya, pemberian rebat sebanyak 10 peratus bagi institut berdaftar pengajian tinggi, sekolah, rumah kebajikan dan rumah ibadat serta penerusan Program Rebate Bil Elektrik RM40, iaitu bantuan bulanan sehingga maksimum RM40 yang diberikan kepada Ketua Isi Rumah (KIR) berstatus miskin tegar dan berdaftar dalam sistem e-Kasih di bawah Jabatan Perdana Menteri (JPM).

“Pengguna yang layak boleh membuat semakan status kelulusan masing-masing di laman sesawang <https://semakanrebat.petra.gov.my/apps/public/index.php> atau hadir ke kedai utiliti elektrik yang berhampiran,” katanya.

Secara keseluruhan, ST berkata, pendekatan itu bertujuan

menggalakkan inisiatif kecekapan tenaga dan penggunaan tenaga boleh baharu yang memberi manfaat bersama melalui sistem tenaga yang lebih efisien dan mampan.

Katanya, semua pengguna juga akan menerima bil elektrik dalam format baharu yang lebih terperinci.

“Susulan pelaksanaan jadual tarif baharu ini, majoriti pengguna dijangka tidak terkesan. Malah, pengguna yang mengamalkan penggunaan tenaga secara cepak akan menikmati penjimatan yang lebih tinggi menerusi Insentif Cepak Tenaga,” katanya.

ST berkata, sebagai badan kawal selia tenaga di Semenanjung, pihaknya komited untuk memastikan pelaksanaan tarif berdasarkan prinsip adil, telus dan mampan bagi memenuhi keperluan dan mengimbangi kepentingan semua pengguna tenaga.

Penstrukturan dan penyelarasan secara menyeluruh itu adalah langkah penting bagi merealisasikan agenda peralihan tenaga negara yang saksama dan inklusif, katanya.